

泛香

奩

詩

草吟





江苏工业学院图书馆
藏书章

周履靖撰

叢書集成初編

(補印本)

泛泖吟及其他一種

一九三九年三月初版
一九五九年十月補印

商務印書館出版

上海虹口印刷廠印刷

序泛泖吟

晉阮嗣宗爲咏懷詩梁昭明止
選十七晉由夜中不能寐始湛
湛長江水終焉而總集云五言
凡八十二首由於心懷寸陰始
墓前焚又者終焉顏延年沈約

爲之註鍾叅軍謂洋乎會於
風雅使人忘其鄙吝知音哉減
榮緒云籍於魏末晉文以代爲
步兵校尉常慮禍患故作是詩
夫周山人者生

聖明之代無官守之寄挺箕山

之操耽渭水之栖獨嗜詩篇風
研風雅凡所占託物以諷緣情
而感和平之體罔乖沉鬱之氣
攸遠又其爲人絕戀紛華履幽
人之貞委懷圖史抱書淫之癖
碎金羣玉此其家不貧鐫石藏

山斯其業不朽阮詩九：踰一
周詩幾盈百其於數也則各有
取爾

長洲張敕撰

泛泖吟序

梅墟先生嗜奇好古有道之士也
家鴛鴦湖濱饒蒹葭鳬鷺水月澹
蕩之觀客嘯漁歌風帆煙艇虛無
出沒半落几上余以為若欲呼野
衲而泛斜陽無過此矣乃先生獨

於甲午秋翩然航一葦來雲間湘
錄錦囊所藏金石古文奇字不可
勝紀余肅入寶顏堂雄談滿座佐
以詩歌往又有峰頭笙鶴霄賓霞
侶之奏曰鴛鴦湖不堪濯纓三泖
者故秦由拳縣也吾欲於此中擷

萼膾鱸一識孫漢陽袁相國及陳
布衣霜白酒香簪菊枝而別吾無
所復泛矣于是吾輩皆舉觴又先
生先生矢口長吟言又五色昔張
志和樵青釣童唱杏花歌陸龜蒙
浮家汎宅日逍遙於短笛殘鐘之

傍皆有題詠顧未嘗一至柳又今
有周先生詩在豈非山川之大奇
哉余自是手一編枕沙上鳥聽其
歌而休焉樂哉所謂永矢勿諼者
也
友人陳繼儒仲醇甫序

序泛泖吟五十韻

甲午之深秋梅顛興遨遊鱸魚思味美蓴菜愛
香柔筆牀伴茶竈情與龜蒙述素琴囊靖節海
岳借虛舟華亭訪玄鶴桂楫泛滄洲白蘋如朔
雪紅蓼似山榴遙盼天邊雁驚翻沙上鷗楓杪
綴赤葉柳底鳴斑鳩漁唱聲款乃輕綸繫曲鉤
蘆汀隱白鷺窺魚迅爾偷牧子歸東郭農人鋤
西疇霞彩成掩映寒烟靄欲浮飛蓬濟南北賈
櫂下中流浮圖高矗矗泖水逝悠悠忽到江邊

岸維纜風帆收白髮頂烏角間身拽羊裘飄然
陟山徑驅馳尋朋儔得扣袁安宅興登萬卷樓
啜茗滌塵鞅笑談適旅愁長揖出荆扉豈肯久
逗遛昔聞何遜園媚麗達九州今來興可翫頃
爾豁俗眸蒼蒼松柏古猗猗林竹脩石峰峙崔
嵬籬菊幾品優平橋橫曲水碧蘿裊綠楸梅杪
花初放幽蘭芽欲抽獨鶴蹁躑舞群鹿聲呦呦
沼面魚頭密亭前花色稠翫賞竟忘夕意氣頗
相投話別欲登轍主人陳酒甌評論幾新句興

至漫賡酬仰天發長嘯對酒狂歌謳絳燭明干
晝情濃酒勝油玆菓盈磁碟綺筵列奇羞呼盧
傾玉笋按曲試箜篌且盡杯中物休論公與侯
人生流電影幻質泛浮漚佳期醉夢過光景等
蜉蝣山水任所好富貴不用囚徜徉爲上智吸
酒是良謀落魄天地間任人呼馬牛此夕一舒
笑洗濯胃中憂樓頭玉漏急童叟報更籌梅影
上虛櫺山月斜丹丘清光逼瑶席寒風涼颼颼
欣然至酩酊夜闌興已休借卧陳蕃榻疑是境

上郵高枕梅花帳朝來主復留歸思弦畔箭登
舟意綢繆還家歡笑語猶憶雲間幽

梅壑周履靖識

泛泖吟

嘉興周履靖逸之甫著

鴛湖早發

囊琴登畫舫觸霧汎江湄
雁唼霜天曉鷄鳴野店時
淡烟迷短檝落月照疎籬
蓴菜肥堪煮鱸魚味正宜

江行

十月雲間棹時光應小
春野田無黍稷江艇有
漁人沙上閒鷗鷺溪邊
媚蓼蘋前途應未遠泖

塔已相親

覓火煨爐

長天斜照下江湄
鼓櫂舟師報晚炊
前渡遙聞漁唱起
買魚覓火煮青葵

客舟夜話

艤艇江邊遇故人
客途相見倍相親
篷窓對月開山酌
瓦缶和霜煮澗蓴
曲徑期君同咲傲
新詩共爾細評論
我儕亦有山公興
醉卧風前倒角巾